

欽定剿平三省邪匪方略

欽定剿平三省邪匪方略正編卷二百十九

庚申年

十一月二十七日

乙巳

山東巡撫惠齡奏言據膠

州協副將寧德稟稱本年十月內接准湖北襄陽縣遣回該營傷病兵丁張福元等七名又高維元等九名先後到營執有襄陽縣文移二角當卽驗看該兵等傷病情形有現尙未愈者有漸次就痊者及展閱來文見其格式乖異印文

模糊似有情弊將原文稟送前來

臣

查核來文

詞句乖錯清漢篆文俱屬錯悞其爲假造無疑
當卽一面飛飭湖廣總督查辦一面飭提該兵

丁到省交按察使方維甸嚴加訊鞫茲據錄供

詳報

臣

逐一研訊該兵丁等僉供委因傷病留

養襄陽業經驗明有店家魏明揚及長隨佟福

轉托襄陽縣家人汪姓及兵房書吏王姓任姓

許給謝銀始得給文回營張福元等七名給銀
四十兩高維元等九名給銀二十五兩零是否
假印實不知情等語但查該傷病兵丁在襄陽
縣留養業經稟驗因何復浼人賄囑領取文書
種種疑竇必須解楚質訊方成信讞

臣

正在委

員起解適接湖廣總督姜晟咨稱查出襄陽縣
雕刻假印捏造文票給與傷病兵丁執持回營

情弊並稱高維元等一起兵丁內徐成業有知情分賊之事咨查前來隨復提徐成業嚴訊堅不承認供係與佟福爭毆挾嫌誣扳顯係因質証無人藉詞狡飾現已將張福元高維元徐成業三名選派妥弁解交該督憲訊定擬其餘兵丁于廷龍等訊供相同毋庸遠道解往已令該營嚴行管押俟楚省訊明知會到日再行辦理

再查軍營患病受傷兵丁在各州縣留養如一
時不能痊愈原應驗明遣回以節糜費但各兵
回營多由各州縣給文遣發是留養各兵隨處
皆可領文回營毫無稽考偽造印文詐騙之事
皆由此起卽實係各州縣給文遣回之兵人數
較衆亦難保無串通吏胥捏報傷病情弊嗣後
傷病兵丁留存各州縣調養者應令該地方官

報明經畧叅贊及該領隊大員派委軍營將領
前往驗明實係養病受傷驟難痊愈者由驗明
將領發給文票方准遣回如距軍營較遠卽報
明該省督撫解送就近道府驗明屬實卽由該
道府給文遣回所有驗明遣發兵丁名數均造
冊申報經畧叅贊各該督撫及領隊大員查核
以杜規避而除積弊奏入

上諭內閣曰此案著交姜晟嚴審定擬具奏至軍營
傷病兵丁在各州縣留養原應驗明遣回若不明
定章程以憑稽核則各處留養傷病兵丁一屆大
功告成均須回籍倘誤作逃兵沿途截拏成何事
體但徑由州縣給與文移又不足以昭慎重其中
捏飾賄囑串通弊混之事自所不免嗣後傷病兵
丁經該營大員驗明交與地方官留養者如遣令

回籍俱應報明督撫由該處道府大員發給文移
不得仍前由州縣率行遣回著經畧叅贊等通諭
各路軍營將各處留養患病受傷兵丁詳加查核
早令回籍歸伍以示體恤而杜弊端

二十八日

丙午

額勒登保奏言竊

臣

前以漢江北

岸先後有竄去之賊關係緊要於十五日由安
康過江連日由漢陰石泉緊顧東面趨程行走

茲於二十日已抵兩河五郎廳地界遂次接據
綸布春汪啟稟報冉學勝股匪於月前竄過江
北之後附近裹脅人數已有一千數百餘衆欲
由石泉鎮安一帶徑竄東北適汪啟在銀杏壩
探剿伍逆餘匪聞信卽由五郎關扼竄鎮安之
路該匪知有官兵折從甘家碯三河口向西而
遁汪啟帶兵卽由大白河東嶽廟石洋溝等處

追逐該匪從深山密箐狂奔又由茅坪八里關
竄至迎風壩汪啟於初八日趕至茅坪維時綸
布春亦帶兵到來遂合兵由華陽一帶進剿賊
匪連夜逃逸我兵於十二日追至留壩之磨子
溝探得賊匪竄至玉皇廟地方相距五十餘里
遂於三更發兵天明時距玉皇廟不遠拏獲賊
探三人訊知賊匪聞有兵來已於兩邊山溝埋

伏汪啟帶兵卽由玉皇廟右手上山並令副將
玉福帶兵由玉皇廟左手上山綸布春帶領馬
步兵勇由溝內直入密探山灣樹林果有賊匪
潛藏我兵高聲喊令埋伏之賊莫逃該匪知己
識其奸計且見溝內馬隊業已衝出兩面山上
均有兵下壓不敢抵拒紛紛敗竄步行賊匪四
散奔入箐林騎馬賊匪順溝飛奔綸布春汪啟

等分路追擊自凌口子至土地嶺約計四十餘里沿途殺賊共三百餘名生擒一百餘名奪獲器械百餘件騾馬三十餘匹新被裹脅百姓散出者不少餘匪向桃園舖奔逃次日仍帶兵追剿等情旋又接據穆克登布報稱伍逆餘匪經官兵節次搜捕之後所剩只有二三百人近於都督河厚畛子菜子坪一帶逃竄一見官兵四

散潛匿山林叢峻之處尋覓無蹤實爲可恨十
二日探得該匪竄至女兒壩龍灘子一帶遂將
所帶官兵分爲兩路令副將張鳳帶領一千餘
名跟蹤追剿穆克登布與桑吉斯塔爾等帶兵
勇一千餘名由周家坎東嶽廟顧住東北向前
抄截十三日晚間趕抵四畝地探得另有大隊
賊匪不知何股至太白廟相距只有三四十里

穆克登布黎明正在進擊又據報賊匪已分兩路前來穆克登布桑吉斯塔爾率同碩敦保雅林保副將富蘭遊擊桑漢等帶領兵勇數百名向賊多處迎擊並令副將愛星阿侍衛明喜委叅領德舒遊擊王成傑帶領兵勇數百名亦分一路迎擊賊匪恃其人衆亡命直撲官兵我軍各併力進攻兩路斬賊各數十人委叅領德舒

力敵陣亡遊擊王成傑亦受矛傷賊已敗走穆克登布乘勢帶兵追逐而進早間因急於發兵營盤鍋帳未動留遊擊周國平照料乃賊匪又分股潛往衝突營盤周圍平竭力堵禦因各營內所留兵勇共三四百名本屬無多衆寡不敵且十三日晚間劄營已運牆壕未能設立堅固營內夫役慌亂以致賊匪突入營盤放火燒燬

鍋帳並有甫經解到餉銀三千兩亦被搶失及至愛星阿帶兵回顧已屬無及委防禦全福筆帖式布詹皆在營奮力殺賊陣亡糧員候補知州畧陽縣知縣崔五峯頭帶矛傷一處不重其時穆克登布桑吉斯塔爾追賊去有十餘里又已殺賊一百餘名忽見後面有賊撲來諒係營盤有失立即帶兵首尾兼顧左右奮力衝殺賊勢

稍却遊擊桑漢腿受矛傷二處幸未墜馬外委
蘇耀昌熊泰陣亡天色已晚與副將愛星阿收
集各兵佔劄山梁是夜賊匪仍分股環撲營卡
均經我兵擊退將獲賊訊供此股係二次過江
再添士王思茂樊人傑之子等股賊衆前因湖
北上龕被剿自徐家壩奔四川之太平竄入陝
西過江由石泉饒峯銀杏壩五郎之青草關等

處竄來等情

臣

查目下賊股分投亂竄此次穆

克登布等分兵原擬截剿伍逆餘黨不意猝遇
冉王樊等賊衆紛至沓來臨時又不得不酌分

迎剿兵力過單以致留駐營盤失利實堪焦憤

幸穆克登布等輾轉力戰官兵未至大有損傷

必須大加整理

臣

已檄飭穆克登布並副將張

鳳帶兵卽來

臣

營聽候指撥此股冉王樊各逆

續竄過江曾經慶成派有總兵胡定泰追剿緣
於途次等候抽集官兵於十六日始得趕抵四
畝地是日賊已竄往洋縣之三郎壩東嶽殿呂
觀河等處該領卽跟蹤追剿惟查賊勢旣衆胡
定泰所帶之兵二千餘名恐有不敷

臣

刻又派

楊遇春格布舍帶領馬步兵勇三千餘名馳往
合力剿辦又查綸布春所剿之冉學勝賊匪探

報已出車道河酒店梁逼近鳳縣地界並恐後
股之冉王煥各逆一經楊遇春等緊追亦尋前
蹤而去或合竄甘境我軍自當跟往剿洗則應
用軍糧甘省亦須趕辦長麟前在漢南將川省
竄出之賊業經截殺回川目下寧沔一帶無賊
且尙有總兵楊奎猷在彼駐守慶成雖在西鄉
聲勢亦可聯絡已札致長麟趕緊催辦糧餉

以利師行再查漢江以南之什添德高馬等道
連日採報尙在紫陽安康交界處所慶溥帶兵
於泰山廟獅子壩等處叠次截剿斬獲一百數
十名惟外委牛奉林陣亡喜明馬玉魁溫承惠
率領兵勇亦在大壩坪白土關攔截臣亦經飭
令慶成喜明馬玉魁溫承惠等分投相機截剿
總以緊顧東面先杜入楚之路爲要但江水淺

涸難保該匪等又不竄江北並探伍逆餘黨尙
有零星在於附近老林潛匿者臣率同札克塔
爾於兩河暫劄遏截東竄道路一面撥派兵勇
搜捕伍逆餘黨一面控扼漢江以南之賊師行
移步換形亦難預行懸定惟當權其緩急上緊
籌辦奏入

上命軍機大臣傳諭額勒登保曰昨據長麟奏冉學

勝一股賊匪由城固竄至留壩擾及廢邱經綸布
春汪啟等趕上截回而陸有仁奏報則稱賊匪竄
至留壩江口擾及棧道高橋鋪松林驛等處朕卽
料及此股賊匪有入甘之勢今據額勒登保奏再
學勝一股已逼近鳳縣地界并恐後股之冉王樊
各逆一經楊遇春等緊追亦尋前蹤而去或合竄
甘境等語果不出朕所料近日有從陝西來京之

員朕詢知陝省收成歉薄是以賊匪無從掠食不
能在陝境逗遛輒思他竄此正

上天垂佑爲剿賊極好機會但亦當盡人事以迓

天庥今閱額勒登保摺內所奏情形札知長麟趕緊催
辦糧餉以利師行看來額勒登保又有追賊入甘
之意此則不可再學勝一股爲數無多卽合之冉
王樊各逆亦不過一二千人况甘省地瘠民貧賊

勢斷難在彼久住其意不過誑誘大兵赴甘復又乘間折回東竄若額勒登保墮其術中帶兵前往必又成尾追之勢况經畧總不可頻頻移動又恐漢江以南高馬等逆必致接踵竄至江北且昨據倭什布奏徐添德一股竄入八角廟其勢東趨已近楚境以目前剿賊緊要機宜而論與其令各股賊匪東竄湖北邊界或闖入鎮安商維一帶毋寧

任其入甘剿辦轉易爲力額勒登保斷不可帶兵
入甘惟當堅持定見督同札克塔爾等在陝境適
中之地扼要駐扎持以鎮靜既可遏賊匪東竄之
路又可控扼漢江以南之賊現據勒保奏德楞泰
已帶兵至陝省西鄉地方剿賊大獲勝仗是漢江
以南既有德楞泰在彼足資剿辦其冉學勝一股
及冉王樊各逆如果合竄甘境長麟係本省總督

卽責成伊帶兵入甘追捕額勒登保已派楊遇春
格布舍帶兵勇三千馳往正可幫同長麟上緊剿
辦額勒登保總以顧住東面爲要若漢江以北賊
匪剿剩無多或仍駐南岸更與德楞泰聲勢聯絡
又據摺內稱穆克登布發兵分擊賊匪其營盤鍋
帳留遊擊周國平照料乃賊匪突入營盤燒燬鍋
帳並搶去餉銀三千兩周國平係穆克登布派令

專管營盤之人於賊匪衝突時防禦筆帖式俱在
營殺賊陣亡而周國平竟不知下落著額勒登保
查明如周國平業經同時陣亡著降一等照都司
例咨部賜卹若未經陣亡卽當將伊革職嚴審定
擬治以應得之罪所有此次陣亡之委叅領德舒
防禦全福筆帖式布詹外委蘇耀昌熊泰牛奉林
俱著咨部賜恤至德楞泰在西鄉剿賊一節尙未

據奏到額勒登保是否聞知或德楞泰業經發摺
經過接道時竟有阻隔遺失之事並著額勒登保
查明具奏

同日勒保奏言查德楞泰統師進山節據探報
賊匪在川陝邊界老林輾轉奔逃德楞泰派令
總兵托雲泰駐防城口卽自帶馬步官兵突入
陝境追躡嗣在西鄉地方有賊乘夜偷撲營盤

當卽督兵擊退獲有勝仗所有此路糧運均經
各糧員設法運供幸無貽悞現聞德楞泰追賊
至通江邊界不遠昨又措銀二萬兩赴通江一
路迎交以濟兵餉又因老林內馬力易疲適經
畧額勒登保撥有營馬到川亦卽籌撥三百匹
就近解往接濟至七十五一路官兵駐劄廣元
現據探報有賊一股竄至寧羌廣元交界之麻

池壩七十五已分兵兩路馳往截剿其餘川東
川北境內並無大股賊匪惟近據東鄉開縣稟
報有零星散匪百餘人在該縣連界之大旺山
深林內潛匿乘夜摸樁

臣

已派令總兵永寧率

領遊擊桂涵酌帶兵勇前往搜捕無論有無著
名首逆在內總須一律殲除各州縣察緝鄉團
並嘉陵江派防兵勇恐有日久怠生均已分派

委員逐處曉諭利害點驗人數務各齊心協力
加意嚴防不可因現無賊氛稍有疎懈兵餉運
脚等項近因新餉未到太平一路存糧甚少擬
卽親赴東鄉一路逐站查催並設法添雇夫騾
源源運送以期有備無患並可就近督辦搜捕
餘匪仍偵探東北路何處有賊竄入卽往何處
迎擊斷不敢株守一隅自取咎戾

勒保又奏言伏查此次教匪不法到處裹脅良民隨行助勢當官兵進剿之際難免玉石俱焚迨臨陣出投並於生擒男婦內訊明被擄未久或剿散後自向各州縣營卡報名投首者均經遵照節次欽奉

恩旨給與銀米遞籍安置在

臣

與德楞泰兩路軍營

每遇打仗得勝凡應釋者或數百人或數十人

均交隨營總理道員等於訊明後給予黃旗派
令將備等押赴附近州縣交與該地方官查照
姓名籍貫派差逐程遞送回籍並無途中流落
之事到籍後均令查照臣前奏通飭章程隨時
驗收酌給搭棚之資准其依附親友寨落編甲
居住查明田產給還可毋庸官爲照顧其無依
無業之民年強力壯有人具保者或點充團勇

或僱作夫役無人具保者或聽其各就手藝自
爲謀生或地方有承辦土木工程令其受雇以
工代賑其實在無依之老弱婦女卽在寬敞地
方搭葢草棚分別男女約五六人合住一棚每
日每名給米五合柴薪錢五文俾免失所行之
頗有成效本年_臣到川後因通巴一帶向爲賊
匪出沒之所專委劉清前往辦理招撫之事自

六月至今陸續投出難民實有一千七百四十
七名均經給與路票銀米遞籍安插其餘向各
州縣營卡自行投首者更不一而足每日地方
官管收遞解均有報冊可稽經臣派員專司核
對清查並無冒濫遺漏情弊惟難民有在荒僻
處所自行逃出及離家較近亟欲奔回並未赴
營卡及地方官投首不請執照而自行回籍者

先經

臣

通飭只可聽其自便不可過於吹求致

滋疑懼亦不許親朋及寨長人等索詐攻訐查

此等各自回籍之人大抵皆有家可歸本不必

官爲安撫惟令該管約保等隨時報明州縣立

案甚屬相安並不令胥役稽查斷不致有藉端

詭詐之事

臣

每遇帶兵經過城鄉寨祠查詢被

擄逃回之人其中割去髮辮者居其大半甚至

有被擄一二次不等者訴其在賊隊中逼脅受
苦情形言之無不淚下察其情狀回籍後均得
各安生業自不致復思從逆間有一二於到家
之後仍復誦習靈文經咒者均經飭令地方官
查訊明確將無知者量予責懲有心者嚴行治
罪現各安靜守法毫無異心竊念此事本祇責
成該管道府董率辦理惟通巴一帶係派劉清

在彼經理茲蒙

聖訓查各府州堅壁清野等事本派有道府丞牧等
官如劉清方積淡士灝周景福等分段管理所
有安撫一事應卽專責各該員督同地方官實
力稽察妥爲安頓均令衣食有資以期仰副

皇仁不使一夫失所至每逢官兵打一勝仗卽有剿
散餘匪或百餘人或數十人或一二十人在深

山樹林內潛藏出沒亟須分兵實力搜查現在
川省團練鄉勇極爲認真此等零星教匪盤獲
解送者甚多現又遵

旨嚴飭各地方官以徐添德王廷詔高二馬五姓人
傑龍紹周張添倫等著各首逆現經官兵追剿
愈緊自不難悉數殲除設或被剿情急亦如張
子聰等隻身潛逃欲於幽僻處所延喘偷生務

隨時給還復業者刻下川境日漸肅清善後各
事均須次第辦理臣現飭該道府會同委員督
率地方各官實力清查將習教謀逆同時起事
田產例應入官者爲叛產被脅被害民戶尙有
避難家口遠去未經搬回者爲荒產全家被脅
被害並無丁男婦女存留者爲絕產分作三項
造冊立案此後無分教匪難民如果從賊隊中

真心出投仍當查明給還其餘荒廢田地首行
召佃收租自明年爲始將每年所得租息據實
報明彙解該管府州作爲歷次支撫難民項下
彌補開銷統俟事竣查有實數另行報部以歸
覈實再查川省自教匪滋事以來所有川東川
北兩屬地方屢次被賊蹂躪失業民人前經英
善宜綿任內奏請賑卹甫經查辦達州東鄉新

寧等處旋因賊蹤竄擾無定本未一律辦竣迨
臣到川後查被賊州縣較多若隨時給賑需費
恐難爲繼是以未經奏請查辦嗣奉

恩旨如賊黨中受撫來歸者均令籌給居食之資旋
經通省司道議稟以被脅從賊民人投出概須
安撫而各州縣並未從賊之被難民人反不能
早爲賑卹不特失業堪憐且恐難民等以從賊

之人尙邀

聖慈撫卹而伊等眷口被害房屋無存轉不得仰叨
仁澤未免向隅等情

臣

因各州縣被賊滋擾該百姓

等劄寨保守在家產素裕者固可自謀生計而
困苦無依嗷嗷待哺者亦復不少然又不能逐
戶照例普行散賑是以奏明於

賞撥餉銀內撥出五十萬兩以十萬兩爲賊隊中散

出難民居食之資儘此四十萬兩發給實無依
靠之極貧難民兩月口糧統計三十七廳州縣
輕重不一每處不過給銀一萬有餘及數千兩
不等當經飭令司道等妥議章程隨據川北川
東兩道籌議條款內稱向來川省報部民數戶
口冊籍俱就土著而言此次清查民數尙有破
難客商人等既經流年寓有自應一律查辦以

免偏枯等情蓋緣川省地方土田饒沃各省流
寓民人或因商販占籍或因耕作寄居生齒日
繁遷移無定向來報部戶口俱由土著民人約
畧而計核之各州縣實有民數則大相懸殊茲
既被賊蹂躪則流寓之民與土著之民自應一
律仰沐

皇仁不便稍爲歧視當經臣批司核議旋經藩司林

奏為查明上二年奏請辦賑之四十萬兩各州縣有將極貧難
出難民之摺抄送到部實與賑撫無涉
臣前奉
在辦賑情形祇將
臣上年二月間覆奏安撫投
干部詰而魁倫並未通查前後原案及歷年實
請先行咨部以歸覈實緣司詳內聲敘不明致
構議以流寓之民部中並無戶口冊籍可稽應

諭旨卽飭藩司楊揆詳細確查茲據該司查明上二
年奏請辦賑之四十萬兩各州縣有將極貧難

民全數賑訖者有祇賑一隅者有因賊匪不時
出沒難以查辦並未散給者所有前項撥出散
賑之銀四十萬兩尙存剩十餘萬兩辦理實爲
撙節並無冒濫開銷卽該司道原詳內亦止據
實聲明川省情形並未於賑卹案內另立流寓
一款以爲影射分肥地步刻下各州縣民人均
經分割硿寨各保身家且軍務未竣當夫充勇

尚可自謀生計現因餉項短絀不但前此存剩
之賑撫銀兩已歸入軍需項下動用不能於賑
撫案內浮冒開銷卽如本年嘉陵江以西各州
縣被難民人先經臣奏請賑卹嗣又查明百姓
漸次復業均各相安毋庸給予賑濟旋卽停止
更不至有所朦混奏入

上命軍機大臣傳諭勒保曰穆楞泰現已帶領馬步

官兵追賊入陝在西鄉地方將偷撲營盤賊匪奮
力擊退大獲勝仗尙未據德楞泰奏到或因棧道
稍有阻滯抑或馳報在途日內自可遞到至川東
川北看來已無大股賊匪其東鄉開縣連界處所
有摸樁賊匪百餘人在深林潛匿勒保切不可因
其人數零星稍存輕視此等賊匪其始不過百餘
人若不及早撲滅則勾結裹脅必致日聚日多集

成大股辦理轉爲費手今春偷渡嘉陵江卽係摸
樁之賊魁倫未能加意嚴防身獲重罪勒保當引
以爲前車之鑒現已派令總兵永寧等帶兵搜捕
勒保務須嚴飭該鎮將等上緊剿辦殲除淨盡毋
留餘孽此爲目前最要之事至所稱偵探東北兩
路何處有賊卽從何處迎截等語此係勒保分內
應辦事件又所奏酌給銀米安撫難民一摺據稱

難民內老弱婦女無有依靠者搭棚棲止每日每名給米五合柴薪錢五文等語此亦非長久之計該督仍須妥爲籌畫設法安頓務令得所至投首回籍之人間有一二於到家後仍復誦習經咒者原可不必深究前曾屢降諭旨官兵剿辦係叛逆亂民並非殲除邪教若如勒保所奏飭令地方查訊確實將無知者量予責懲有心者嚴行治罪如

此分別辦理則胥吏等又得以查辦爲名擾累滋事
前此川楚匪徒皆由地方官查拏邪教激成事
端勒保寧不知之此奏斷不可行其清查叛產分
別三項造冊立案自應如此辦理再據覆奏賑卹
難民銀兩一節係因魁倫未經通查前後原案及
歷年辦賑實情以致部臣駁飭著勒保另行分晰
查明咨部察核

欽定剿平三省邪匪方略正編卷二百二十

庚申年

十二月初一日

己酉

德楞泰奏言竊

臣

前在太平

白菓壩與勒保會商籌剿勒保暫回太平

臣

卽

帶兵直趨城口進發十一月初八日行至平壩

三灣接據署城口主簿張雲漢稟報該處賊匪

聞大兵前來又被團勇截殺已經遠遁現在城

口地方已無賊股滋擾因思城口地居萬山之

中爲太平紫陽平利大寧四邑往來適中要隘
歷年以來各逆藉爲藏身之藪現當賊勢萬分
窮蹙之際若無兵駐防則各匪往來屯踞其間
而兵至賊去兵去賊來殊多窒礙當令總兵託
雲泰等帶兵勇三千名在彼擇要拿管以杜賊
匪竄陝之路並可搜剿山內餘匪正在哨探賊
蹤間接長麟移稱據南鄭城固西鄉等縣稟報

前在花石梁螞蝗溝鍾家溝旗杆山細辛壩等處竄擾各匪均已先後逼出陝境但仍在界嶺一帶老林內遊奕尙未遠去又接提臣七十五來信以現在川北賊匪時欲窺伺廣元蒼溪一帶江岸賊衆兵單恐難兼顧各等情查太平山內各逆業已遠颺臣自不便遠涉城口致疲兵力且川北已有數股賊匪尤應先其所急況邊

界老林之賊未便令其盤踞自應逼令入川至
爲剿辦但我兵若由太平大道直赴川北又恐
邊界之賊聞風入陝

臣

遂由西鄉之漁渡壩簡

池壩等處邊境行走繞出賊之北面逼賊南向
十八日趕抵南江之舊城探得楊開甲等三姓
餘黨並李炳陳朝觀兩股合夥每股數百人于
餘人不等約共三四十人聞我兵由東北而來

不敢零星散處合爲一股由賈元蒼溪境內走
南江之元潭子巴州之南垓場華溪寺一路向
東奔逃七十五因廣元旺蒼瀾等處尙須搜捕
零匪且可就近防顧江岸未便遽行移動

臣

又

撥給兵一千名卽令其仍在蒼廣南巴一帶擇

要駐守搜捕餘匪可以照應江岸並遏該匪由

川北竄陝之路

臣

卽帶兵星夜前進查楊陳李

等各逆業已東走非竄東達雲開卽去通江太平勒保因聞賊有東趨之信已由太平趕至東

鄉

臣

卽札致勒保由東鄉探迎截擊

臣

帶兵卽

自西北而東正可收兩面夾攻之效務期將此股賊匪卽於川境內趕緊掃除斷不令其復又他竄頃又接據張雲漢稟報太平接壤陝境之修溪壩高觀寺等處又有賊匪滋擾不知首逆

姓名現已稟明託雲泰各等語查太平山內團
勇素爲得力現又添駐官兵聲威更盛當已飛
札託雲泰等會同張雲漢多集該處團勇分投
堵剿務須就地掃除否則亦當逼入川境總不
可令其再行折陝現在各道無非敗殘餘匪自
知罪惡貫盈滅亡在即見兵即逃惟以狂奔爲
苟延殘喘之計

臣

旬餘以來自東北而西南西

鄉邊界一帶並無賊匪未得接仗憤懣焦急茲
已幸得將各匪逼令聚聚東竄惟有趕緊剿除
萬不敢稍予以暇自取遲延之咎奏入

上命軍機大臣傳諭德楞泰勒保曰德楞泰半月以
來未有奏報日深厯念嗣據勒保奏德楞泰統師
進山節據探報賊匪在川陝邊界老林輾轉奔逃
德楞泰派令總兵託雲泰駐防城口卽自帶馬步

官兵乘入陝境追躡在西鄉地方有賊乘夜偷撲營盤當卽督兵擊退大獲勝仗其餘川東川北境內並無大股賊匪惟東鄉開縣有零星散匪百餘人在大旺山深林內潛匿乘夜摸樁已派兵前往搜捕等語方以德楞泰捷報當已在途或因棧道阻滯尤深盼切乃本日德楞泰奏報不但未獲勝仗且往來奔逐竟未與賊接仗其所稱由西鄉邊

境行走繞截賊匪通令夥聚東竄之處不過敷衍
空言且摺內只稱楊開甲等餘匪及李炳陳朝觀
兩股賊匪現在東竄而於黃白藍線各股竄匪絕
不提及非巧言搪塞乎昨據額勒登保奏再添士
王思茂及樊人傑之子等股賊衆由川省太平竄
入陝境渡過漢江北岸欲圖合竄甘境非卽黃白
藍線股內之賊乎看來德楞泰於此等大股賊匪

並不能實力攔截縱令竄出川境不過以截回小
股賊匪支吾搪塞實亦並未跟蹤追躡又憚於赴
陝推藉稱川境賊匪未經剿淨留爲跼脚地步或
伊在西鄉於賊匪偷劫營盤時竟至折挫失利未
敢據實奏出亦未可定而勒保輒以德楞泰奮力
擊退大獲勝仗具奏若非勒保探報不實卽係德
楞泰有意隱瞞思掩飾其挫衄之咎以致伊二人

前後所奏互相矛盾二者必居一於此卽所稱兵
至賊去兵去賊來二語難辦之處固在於此但德
楞泰等必當同心併力設法奮擊方可以次殲除
若徒以剿辦窒礙爲詞任賊肆行竄擾毫無振作
惟事往來追逐轉至兵力疲乏則兵至賊去兵去
賊來長此安窮豈竟待賊自盡又安用集兵糜餉
爲耶况該省兵力不爲不多所需餉項並不待伊

等奏請節經陸續撥解似此兵精餉足尙何可藉
口而蔽事迄無把握所辦何事德楞泰自稱憤懣
焦急試思剿辦賊匪如此延玩空言何益而朕之
焦急實有刻難自釋者德楞泰寧不知之且軍務
一日不竣生靈受其荼毒尤不忍言德楞泰何得
泄泄若此實屬負恩著傳旨嚴行申飭勒保前奏
不實亦著傳旨申飭並著伊二人將因何前後奏

報彼此不符之處各行明白廻奏伊二人業已貽
悞於前此時惟當各知愧懼奮勉自効務於年內
將川境賊匪悉數辦竣德楞泰仍當赴陝協剿漢
江南岸之賊且現在陝境如再添士王思茂樊人
傑之等各股賊匪卽係川省不能實力攔截所致
本卽應治罪今暫從寬若能將本境之賊先行剿
淨移兵前赴陝省協剿竄匪尙可稍贖前愆尙仍

前念玩則是甘蹈重罪身家性命所係禍福惟其
自取此時卽革去花翎降其頂戴亦不足示懲姑
俟伊等奮力自贖若屆期不能辦竣朕惟有執法
從事按律懲辦斷不寬貸亦不患無人更換也凜
之慎之

初二日

庚戌

上命軍機大臣傳諭各路軍營帶兵大員四川陝甘

湖北各督撫曰自邪匪滋事以來剿辦已及五載
總無戢事之日近據各路奏報賊匪仍復東奔西
竄官兵雖隨處追擊總不能遏其去路歸併一處
聚而殲洗看來年內戢功之說又成虛願推原其
故總因帶兵大員及各督撫等仍存此疆彼界之
見祇將賊匪驅逼出境卽爲盡職並不協力會剿
以致川陝楚三省竄匪出彼入此來往自如卽被

一路防堵官兵剿敗殺賊雖多而前無攔截後無
追躡沿途裹脅又成大股仍與未經剿殺者無異
似此輾轉奔逐年復一年何時始能剿盡亦斷無
如此追逐卽能成功之理是堵之一字亟須實力
辦理從前降旨令伊等各在本境堵剿原因彼時
股數甚多不得不各顧疆界以專責成嗣經官兵
節次剿殺各股賊匪統計不過萬餘而奔竄地方

亦僅在川陝楚三省邊界伊等正當無分畛域或
併力合剿或互相策應以期一股殲除乃彼此推
諉觀望人各一心並不會籌協剿使賊匪得以紛
紛四竄其勢又將散漫譬諸行圍必須面面兜合
漸逼漸緊方能有獲若四散驅逐卽終日而不得
一禽此事之顯而易見者伊等寧不計及耶辦賊
之法不外剿堵撫三者而均以兵餉爲要現在各

路征兵不下十萬軍成不爲不盛而所需餉銀朕
不待伊等奏請無不預爲籌撥源源接濟卽如陝
省南山內伍逆餘匪所剩不過二百餘人而官兵
現在萬餘不啻多至數十倍尙未見搜剿淨盡若
似此辦賊卽百萬雄兵亦復可益伊等尙得藉口
於兵力不足乎至各路軍營若果因餉項不繼致
有掣肘則朕先認過軍機大臣不能先事預籌尤

難辭咎朕豈肯令伊等稍有缺乏致悞事機斷不
必以此爲慮且朕之宵旰焦厘者蓋賊匪一日不
除則百姓多遭一日慘殺生靈荼毒村落爲墟言
念及此朕實寢食俱廢伊等尙不思激厲愧勉同
心敵愾耶此時東面有倭什布長齡西面有長麟
慶成南面有德楞泰勒保北面有額勒登保楊遇
春等總須四面嚴堵彼此通盤籌畫聯絡聲勢協

力以堵爲剿卽在川陝楚邊界將各股竄匪悉數
殲擒方爲不負委任大功告成八人同受厚恩是
朕昕夕代汝等默禱於

天之至願卽萬不得已亦祇許將陝楚之賊逼歸四川
剿辦易於得手斷不許令四川之賊竄往陝楚卽
如德楞泰昨奏因楊陳李等逆有東趨之勢德楞
泰卽自西北而東繞出賊前迎截伊旣知賊匪不

可令其東竄陝境卽應遏其去路奮力剿盡何以
任其東趨始行繞道抄截而藍黃白線號內之冉
添士王思茂及樊人傑之子本由川省竄往湖北
嗣復由湖北竄回川省今又從川省逸入陝境復
圖合竄入甘此卽德楞泰勒保不能截住川省大
股賊匪之明証任四號逆賊由楚假途入陝蜀地
弁兵所辦何事今僅將楊李陳等小股截回於事

何益耶總之賊匪聚則易剿散則難辦兵力令則
厚集分則見單伊等接奉此旨後若再不同心合
力速將各路賊匪悉數掃除延至明春青苗在地
賊匪仍得掠食飽颺又稽歲事軍法具在朕亦惟
有將伊等按律治罪此亦伊等自貽伊戚實不願
國家有此事惟在伊等勉圖贖罪迭奏膚功勿負
朕諄諄教誡也

臣等謹案兵貴神速蓋轉移進退之機有間不容髮者此次剿捕之事自經

睿謨訓示嚴切督促以來各路元戎疊奏俘渠告捷之功特以賊股散漫狡黠走險沿途復有裹脅官兵馳逐往來尙稽蕲績

皇上宵旰焦厘以賊匪一日不除則百姓多遭一日

慘殺

軫念惻憐至於寢食俱廢且因四面分堵各專責成
伏讀

聖諭昕夕代爲默禱於

天以冀大功告成八人同受厚恩仰見

至誠感孚

訓辭深厚不獨將帥之臣倍思振奮報

恩凡在戎行莫不聞而起舞同心敵愾是以疾風掃

籌之助不旋踵而立效也

初三日

辛亥

長齡奏言前因徐添德一股復自陝

省東趨必當預籌防堵倭什布分帶官兵轉回

二竹相機堵剿

臣

同明亮孫清元乘勝追剿

臣

與倭什布分路後仍卽向南跟追該匪知官兵
剿逼甚緊不及西向卽由興山屬之公坪水月
寺馬湖山等處直往東趨所過並不焚燒房屋

臺役疾馳一百數十餘里臣與明亮孫清元熟

爲計議該匪素稱狡譎現在行走俱非常路大山雪嶺溝深路窄誘我官兵深入以遂其下竄荆宜之計就此窮追不特難以得手且恐墮其奸計必得抄路兜迎是以改由保康之歐家店歇馬河入南漳之馬良坪通城河遶至遠安之荷花店於二十二日途次楊家大廟探報該匪

現竄東湖屬之陳家坪交戰垭一帶滋擾

臣趕

至符家坪暫爲歇息於二十三日五鼓集兵進

發山峽甚窄馬步難行辰刻始抵廟垭見有瞭

探賊匪百餘名扼住垭口

臣

當派副將朱士奉

都司姜元祥帶領奮勇兵勇迎前仰攻垭口立

斃賊匪四十餘名該匪折回奔竄我兵緊向下

壓追至陳家坪又有賊匪三四百名吶喊抗拒

臣

同明亮孫清元率領馬步各官兵連隊而進

匪徒見官兵勢衆卽向交戰臣率領侍

衛等正在督兵追擊又見山埡伏賊一千餘名

突行衝出該處路通一線兩面石壁極形陡險

既難分路進兵尤難搶佔得手頗形掣肘臣當

與明亮復將官兵撤出峽口臣孫清元帶同遊

擊常德署遊擊楊安等率同廣西宜昌官兵由

左手一路進攻

臣

明亮帶同富翰塔津保叅將

德興晉泗起等率領馬步官兵同知蕭興潔帶

領竹山鄉勇首領黃富元鄭光明等各帶練勇

由右手一路前進

臣

長齡率同副都統職銜總

管托爾托保侍衛呢瑪善徹布登副將王懋賞

都司高永耀督率官兵從中分兩路進擊正當

各路官兵搶至半山該匪分投下壓勢極兇悍

我兵奮力抵拒賊衆拚命抗敵亂石如雨自辰
至未相持三時之久副將朱士奉手受矛傷左
右脇各帶石傷都司胡俊鴻受矛傷五處都司
姜元祥受石傷二處俱各無妨千總唐盛高頭
頸胸膛脅背受傷九處甚重外委梁志光首先
搶撲力竭陣亡各官兵憤恨莫遏鎗箭並進大
礮轟擊仰攻直上立斃賊匪一百餘名生擒賊

匪一百五十二名該匪四路翻山滾崖而逃各官兵乘勝趕殺二十餘里沿途殲戮不計其數搶獲烏鎗三十五桿長矛四十三桿大礮三位旗幟二十六面騾馬五十三頭匹逃散難民甚衆時已向晚山徑甚窄難以前進卽於黑石壩駐紮當將獲犯訊供內任光萬楊尙年二犯係四川人現當衝隊先鋒最爲驍勇據稱首逆高

二是大掌櫃同王廷章楊一桂閔慎先俱爲爲
元帥有戰手一千餘人襄陽人多川陝人少新
擄二千餘人共有三千餘人高掌櫃商議哄誘
官兵入山險窄之處埋伏抗拒可得便宜總要
找尋小路令官兵馬力難施如能竄至當陽遠
安地面寬濶可以覓食度命等語當卽褫割餘
匪劉正貴等五十三名訊俱打仗日久均卽正

法新畧男婦九十七名就近解交東湖縣查明
卹釋放回籍臣現探賊蹤仍卽緊躡追剿以
期迅速蕲事仰慰

聖懷再連日二竹一帶徐添德尙無竄近楚邊之信
倭什布於此間分帶官兵六百名並可就近將
臣留駐竹谿之兩粵官兵一千名馬隊一百餘
名歸併統領再於各邊卡抽調兵勇自可以資

堵禦此次兵勇接仗實爲奮勇出力謹分別開
單恭懇

聖恩鼓勵其傷亡兵勇容俟查明咨部辦理奏入

上命軍機大臣傳諭長齡曰高二一股聞知官兵剿
逼甚緊卽由興山等處直向東趨長齡與孫清元
明亮等改由保康南漳一帶繞至遠安抄路兜迎
分投截剿在廟垓交戰垓等處陟厯山險奮力進

擊共殲斃賊匪一百四十餘名生擒一百五十餘
名此次打仗殺賊尙爲認真出力惟擊敗餘匪仍
翻山逃逸首逆高二未能擒獲尙不滿意該逆屢
次戕害大員最爲可惡卽長齡等亦稱其狡譎竄
擾三省同深憤恨尤當倍加奮勉督率官兵卽在
湖北境內將高二迅速殲擒遵照節降諭旨將該
犯首級致祭被戕之各大員以慰忠魂而雪衆憤

並將賊匪夥黨剷除淨盡勿留餘孽卽爲長齡等
之功朕必加之重獎此時賊蹤距川省甚近不得
僅以驅逼人山卽爲完事也此次帶兵員弁俱能
奮勇內千總唐盛高身帶九傷尤爲出力已同其
餘各員分別加恩所有殺賊陣亡之外委梁志光
著照把總例咨部賜卹至徐添德一股現未竄近
楚省邊境自屬甚好但楚省邊防尤應嚴密現在

倭什布已分帶官兵六百名並將留駐竹谿之兩
粵官兵一千一百餘名歸併統領務須實力督率
扼要堵禦毋使一名闖入倘有疎虞惟倭什布是
問至高三馬五一股現在竄至何處是否距楚已
遠與徐添德是否聯絡此數賊會否剿敗一經得
有信息著倭什布長齡速行具奏

上諭內閣曰長齡奏請將打仗奮勇出力員弁懇請

加恩副將朱士奉著賞戴花翎都司姜元祥同知
蕭與潔俱著賞換花翎驍騎校委佐領果興阿驍
騎校委叅領同善防禦委叅領塔斯呼里把總劉
得貴鄉勇首領黃富元鄭光明俱著加恩賞戴藍
翎都司胡俊鴻著加恩以遊擊補用至于總唐盛
高一員身受九傷甚重實爲奮勇可嘉著加恩先
賞給守備頂帶遇有缺出卽行題補並賞戴花翎